



## **USUL MENJUNJUNG KASIH**

**YANG BERHORMAT**  
**DATO SERI SETIA Ir. AWANG HAJI SUHAIMI**  
**BIN HAJI GAFAR**  
**MENTERI PEMBANGUNAN**

Hari Selasa, 15hb. Rejab 1441 bersamaan 10hb. Mac 2020

Dewan Persidangan

Jabatan Majlis Mesyuarat

Bismillahir Rahman Nir Rahim

Assalamualaikum Warahmatullahi Wabarakatuh

Yang Berhormat, Yang Di Pertua Dewan dan Ahli–Ahli Yang Berhormat,

Kaola terlebih dahulu ingin menyembahkan setinggi-tinggi menjunjung kasih Kehadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al-Mahrum Sultan Haji Omar 'Ali Saifuddin Sa'adul Khairi Waddien, Sultan dan Yang Di-Pertuan Negara Brunei Darussalam di atas keberangkatan dan limpah kurnia titah Baginda bersempena Majlis Istiadat Pembukaan Rasmi Mesyuarat Pertama dari Musim Permesyuaratan Ke-Enam Belas Majlis Mesyuarat Negara, pada hari Isnin, 14 Rejab 1441H bersamaan dengan 9 Mac 2020M.

Kaola sukacita menyokong usul yang dicadangkan oleh Yang Berhormat Pehin Orang Kaya Laila Bakti Diraja Dato Laila Utama Haji Awang Isa bin Pehin Datu Perdana Manteri Dato Laila Utama Awg Hj Ibrahim, Penasihat Khas Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam bagi menyembahkan setinggi-tinggi menunjung kasih Kehadapan Majlis Kebawah Duli Yang Maha Mulia Paduka Seri Baginda Sultan Haji Hassanal Bolkiah Mu'izzaddin Waddaulah ibni Al Mahrum Sultan Haji Omar Ali Saifuddin Sa'adul Khairi Waddien, Sultan dan Yang Di Pertuan Negara Brunei Darussalam diatas titah baginda yang telah dikurniakan semasa istiadat pembukaan rasmi permesyuaratan ke-enam belas kelmarin.

Melalui Titah Baginda dan dengan mengamat-amatinya, sesungguhnya sangat padat dan bernas yang mengandungi nasihat yang mencerminkan keperihatinan dan kebijaksanaan Baginda dalam memastikan kemakmuran dan kesejahteraan rakyat dan negara sentiasa terjamin.

Koala ingin menyentuh mengenai dengan kualiti sektor pembinaan di Negara ini yang telah di titahkan oleh Kebawah Duli Yang Maha Mulia Paduka Seri Baginda Sultan dan Yang Di Pertuan Negara Brunei Darussalam dan menekankan keperluan pengawasan dalam memastikan projek-projek dilaksanakan dengan baik dan teliti serta penggunaan wang Kerajaan agar digunakan dan diurus secara telus dan amanah. Selaku agensi yang dipertanggungjawabkan bagi pemudahcara pertumbuhan industri pembinaan dan pengurusan projek-projek kerajaan, Kementerian Pembangunan sangat-sangat menjunjung kasih diatas titah saranan Baginda itu dan akan sentiasa berusaha untuk meningkatkan kualiti sektor pembinaan di negara ini. Izinkan Kaola melalui Dewan Yang Mulia ini mengongsikan beberapa inisiatif seperti berikut:

1. Pegawai projek atau pegawai pengawas yang ditugaskan di tapak-tapak projek ke arah memastikan kualiti pembinaan adalah sentiasa ditahap yang memenuhi keperluan sebagai seorang pengawas termasuk juga kualiti bahan binaan yang memenuhi kehendak spesifikasi kontrak. Melalui Garispanduan *Quality Supervision Manual* yang disediakan oleh Jabatan Kerja Raya adalah merupakan dokumen rujukan bagi semua pegawai projek

atau pegawai pengawas yang telah diguna pakai dalam memastikan tatacara prosedur pengawasan projek-projek Kerajaan yang lebih efektif dan teratur dan menurut piawaian kontrak. Garispanduan ini juga InsyaAllah akan diedarkan kepada semua pihak-pihak yang berkenaan yang dipertanggungjawabkan bagi mengurus dan mentadbir projek-projek pembinaan. Insya Allah, pihak Kementerian akan sentiasa menambah baik garispanduan ini dari masa kesemasa mengikut peredaran masa dan keadaan.

2. Mengenai dengan bahan binaan pula, kesemua produk yang akan digunapakai di dalam projek-projek Kerajaan adalah dikehendaki untuk berdaftar dengan Kementerian Pembangunan melalui pembekal yang berdaftar. Penubuhan Jawatankuasa Pendaftaran Produk Bahan-Bahan Binaan (JKPPBBB) di bawah Kementerian Pembangunan berperanan untuk mendaftar bahan binaan yang digunakan dalam industri pembinaan serta meneliti dan menilai laporan ujian yang dihadapkan oleh syarikat pembekal dari masa kesemasa sebelum mendapat kebenaran untuk produk tersebut didaftarkan dan diguna pakai bagi projek-projek Kerajaan.

Insya Allah, pihak Kementerian bersama dengan agensi-agensi yang berkenaan akan terus berusaha untuk mempertingkatkan lagi usaha dan inisiatif dalam menangani projek-projek Kerajaan dan akan sentiasa membuat pemantauan agar tidak berlaku penyelewengan seperti penyelewengan menggunakan bahan-bahan yang murah atau rendah kualiti dan menjunjung kasih dan terima kasih atas beberapa cadangan

dan saranan serta buah fikiran daripada Ahli-Ahli Yang Berhormat untuk sama-sama menambahbaikkan inisiatif yang sedia ada.

Itulah saja yang kaola dapat sampaikan bagi menandai dan menjunjung titah Kebawah Duli Yang Maha Mulia Paduka Seri Baginda Sultan dan Yang Di Pertuan Negara Brunei Darussalam di Dewan Yang Mulia ini.

Sekian,

Wabillahi Taufik Walhidayah

Wassalamu Alaikum Warahmatullahi Wabarakatuh.